

Xujun xi ma joho xi kits'ínkjihí nda postru Pablo Timoteo

B'i ts'ín kikjaniñaha Pablo Timoteo

1 An Pablo, an xi kama nku nda postruhu^a Jesucristo at'aha Ntíaná b'a ts'ín kama mjehe. Tíbitjusun ni xi kitsúya títjun nga ts'ínk'íéntu tík'un xuta xi s'ejihin Cristo Jesu. ²Tífaniñaha Timoteo, ji xi nkúhu tsa ntína ko tjo nkjúnna ji.

Katsjáhi kjuanda ko kjuajyu Ntia Naminá ko Nda Ntíaná Cristo Jesu ko nda katasehi.

B'i ts'ín kitsjá nga'yúhun Pablo Timoteo

³Nístjin nístjen nechjantjáhi nginkun Ntíaná ko tsjaha máb'achj'íhi ngat'a ts'e ni xi t'n'ei. Kui xi tít's'inxát'aha xi nkú nga ta kits'ín ntje chána ko je tjíya kjuankjintak'unna nga b'a tít's'ian. ⁴F'áítsjenna nga kich'í ko mjena skue ngáha ra tu xi b'a ts'ín tséjihinna kjuatsjo. ⁵Ts'ínkj'áítsjen xi nkú ts'ín ngayjehe animahi s'ejihin Ntíaná. Tjun Loída, nacháhi, b'a ta ts'ín kis'ejihin, ko Eunice, náhi. Nd'ai be sisihin k'an nga ko ji b'a ta ts'ín s'ejihin.

⁶Kui b'a maha, tít's'ínkj'áítsjehen ra nga n'e'yúnyai kjuanda xi kitsjáhi Ntíaná nk'ie nga kingjennéhe ntsa. ⁷At'aha najmi kjuabinkjun tsjáná Espiritu xi kits'ín nibáná Ntíaná. Nga'yún ní tsjáná ko kjuatjo, ko ta tsjáná nga naxu s'eyaná.

⁸Kui nga najmi tu n'e subaha ri yjohi nga k'úénijmí Nda Ntíaná ko ta ndaha nga kjíya'yán ngat'aha nga t'ib'enijmía. Nga'yúhun Ntíaná katasinkohi nga kuitjájín kjuanima ngat'aha én nda tsuhu Ntíaná xi nkúhu an. ⁹Ntíaná kits'ínk'an kiná ko j'ájinná nga kamaa xuta xi ts'e. Tunga najmi ngat'aha ní ni xi kin'eé j'ájihinná. B'a ní kits'ín at'aha b'a ts'ín y'énda títjun ko b'a ts'ín nibá kjuandaha. Kintehe ni nga kamanda asuntei, ajihin Cristo Jesu kits'ín nga ñá tsuhuná kjuanda xu'bi. ¹⁰Nd'ai ni ma ja y'éjña chji kjuandoo nk'ie nga ja j'ai Cristo Jesu xi kits'ínk'an kiná nga j'ai kjaxín nga'yúhun ngabayoo ko ts'asje chji nga kama kuínsuba tík'un síán tu ngat'aha én nda tsuhu Ntíaná.

^a 1:1 “Xi kis'exá” tsuhu ra “nda postru” ko a ra “já postru”.

¹¹Ntĩaná kits'ín mana nku xi b'énijmí éhen, nku nda postru ko nku nda maestru. ¹²Kui kjuaha nga tíf'ajihinna kjuanimá. Tunga najmi subahá mana, at'aha be yá xi kits'in s'ejian ko behe k'an nga tjihin nga'yún nga kjuátjo ni xi kits'ínkjas'enna. B'a ts'ín santaha nkúhu nga kuichú nistjin nga chasehe mí nihi xi kits'ín nga nkúnkú xuta.

¹³Ndjá n'e s'ejin Cristo Jesu ko tinchinjin kjuatjoho. Xi nkú kits'ínkoho nga tsakuyáha, ni nda xi tsakuyáha, b'a n'ei. ¹⁴Nga'yúhun Espiritu Santo xi tíñajinná chúnkoho ri én nda tsu xi kin'ekjas'ehin.

¹⁵Ja yai nga ja incha kits'ín nga mana ngayjee xuta xi tjin nga ngúsuhun ante Asia. Santaha ko nda Figelo ko nda Hermogene b'a kits'ínkona.

¹⁶Ntĩaná katase nimaha xuta xinkjin nda Onesiforo. Nkjin niyá kitsjá nga'yúnna ndo ko najmi kama subaha ngat'aha nga kjiya'yán.

¹⁷Ni xi kits'ín ní, nk'ie nga j'ai nanki Roma tsangisjaina santaha nkúhu nga kisakúhu an. ¹⁸Nda Ntĩaná katase nimaha nistjin nga chasehe mí nihi xi kits'ín nga nkúnkú xuta. Ko ji ja ya sisin xi nkú ts'ín tsasinkoná ndo nanki Efeso.

B'i ts'ín y'éjña chubaya Pablo nk'ie nga tsakúyaha Timoteo

2 Kui b'a maha, ji ntĩna, n'ejahani nga'yún xi sakújinná kjuandaha Cristo Jesu. ²Ko ni xi kinu'yái nga kixian nginkun nkjin xuta, kui xi n'ekjas'eihin já xi ma 'yún tak'aán, já xi kama kuakúya ngáha ra kj'ái.

³N'e chúkjuai kjuanimá xi kuitjain, at'aha ji xi nkú joya nda juhun Cristo Jesu ji, nda jun xi nda ts'ín xáha. ⁴Yaá nga ndaha nku nda jun xi tĩkjan najmi tsungijin yjoho ni xi tjin asunnte. B'a ts'ín at'aha mjehe nga nda skuehe xi kitsjá xáha. ⁵Ko ta máha nku ndatsuton, najmi kama ts'ín ngana tsa najmi tsúton xi nkú ts'ín tíña nga nuton. ⁶Ko ta máha nku xi títs'ín kjuanimá nga títs'ínxá, bichú nistjin nga sakúhu ni tjun xi b'éntje. ⁷N'echubayahĩ yjohi ni xi tíxihin ko b'a ta ts'ín Nda Ntĩaná ts'ín nga kamankjihin ngayjee ni.

⁸N'ekj'áitsjein Jesucristo xi j'áiya ngáha ra ngabayoo, xi ntjehe David y'aha ra. B'i tsu én xi tĩb'enijmía. ⁹Ko kui ngat'aha éen un tíbehena ko santaha kjiya'yán xi nkúhu tsa an xi nda ch'on k'an. Tunga máha éhen Ntĩaná, najmi kjiya'yún. ¹⁰Kui nga ngandaha xuta xi Ntĩaná j'ájin títs'ín chúkjuahana ngayjee ni xi tímat'an, tu xi ko kui incha sakúhu ra nga Cristo Jesu ts'ínk'anki ko tsjáha kjuachánka xi najmi maha feya.

¹¹Ma n'e s'ejin én xi tsu:

Tsa tsayaká Cristo,
ta kuintsuba tĩk'unko ngáhaná.

¹²Tsa tĩn'e chúkjuá nga un tĩbená,

ta kuatexumakaá.

Tsa najmi n'ekie yjoná nga yaá,
ko kui najmi ts'íinkie yjoho nga bená.

¹³ Tsa najmi ch'a s'ejihin ñá,
tunga kui ma ma 'yún tak'aán,
at'aha kui najmi maha ts'ínjo éhen.

**B'i ts'ín tsakúyaha Pablo Timoteo xi
nkú ts'ín ts'íinxát'aha Cristo**

¹⁴ N'ekj'átsjeihin xuta ninku, nginkun Ntíaná tu xí b'ahá t'ihin, nga najmi tu mí éhen ni incha k'uésiyáha, at'aha kui ni xu'bi xi najmi chumi ni chj'ihí ra. Tu sa ní ts'ínndyjajihin xuta xi mjéñjuhu kui niu.

¹⁵ Ngayjehe k'uin n'ei ni xi nda nginkun Ntíaná tu xi nda skuehe ni xi t'ín'ei. N'ei xi nkúhu nku nda musu xi najmi ma subaha ni xi t'íts'ín ko xi nda ts'ín bakúya én xi naxu tjín.

¹⁶ Najmi tu nungijin yjohi én tiya xi tjín asunnteí, at'aha xi b'a ts'ín nchja, kui xi tu nku fi t'axíhín ra Ntíaná. ¹⁷ Ko kui éhen xi nkú joyaha tsé xi finanka. Najmi maha manda. B'a ts'ín tsatsun nda Himeneo ko nda Fileto. ¹⁸ Kui xi ja ngji t'axíhín ni xi naxu tjín. B'a tíincha tsu nga ja j'a nistjin nga kj'uaqíya ngáha ra xuta ngabayoo. B'a ts'ín t'íts'ínndyjajihin ra k'ua xuta xi s'ejihin Ntíaná. ¹⁹ Tunga tu nkú ndjáhá síjña éhen Ntíaná. Síjña xi nkúhu nku xjó xi: “Nda Ntíaná be xuta xi ts'e”, tsu ntu xi tjít'aha. Ko b'a ta ts'ín tjít'a yaha: “Ngayjee xi tsu nga s'ejihin Cristo kats'ín t'axíhín yjoho ni xi najmi naxu nginkun Ntíaná.”

²⁰ Xi nkúhu nku ni'ya chánka, najmi tu suba ni toonsine ko toontaba tjíhín. Ta tjín níhi ni xi kamandakoho yá ko ninte. K'ua xi n'echjén nk'ie nga tjín s'í ko k'ua xi n'echjén tehente. ²¹ Ko b'a ta ts'ín tjíña ajinná. Tsa tjín xi ja kits'ín je yjoho, kui xi nkú joyaha ni xi ma n'echjén nk'ie nga tjín s'í. Ja je ko Ntíaná kama ts'ínchjéhen, at'aha ja tjíndaha yjoho nga kama ts'ín ngayjee ni xi nda.

²² Chíhín yjohi ni xi nchjaha animaha já istiu. N'ei ni xi naxu nginkun Ntíaná, tu nku n'e s'ejinní Ntíaná, ko kas'ehi kjuatjo ko kjuajyu. Nkúhu n'e makoí yjohi xuta xi je tjíntuyá animaha ko nchjaha Nda Ntíaná. ²³ Najmi tu n'esihín én tsujnu tsut'a ko én xi najmi tjíhín sin xi nchja xuta, at'aha ja yai nga yo nibáha ra kjuachán. ²⁴ Xi t'íts'ínxát'aha Nda Ntíaná najmi tjíhín nga kjuachán kjuájin yjoho. Nda ní ts'ín kats'ínsihín ngayjee xuta. Ko tjíhín nga kamaha kuakúyaha xuta. Kats'ín chúkjuá ni xi kamat'ain.

²⁵ Nimakjuá kat'asje yjoho nk'ie nga tsjáníyaha xi tífi kontraha. Kutsa Ntíanáhá tsjáha xuta xu'bo nga ts'íink'óntjaiya animaha nga skue ni xi naxu tjín ²⁶ ko nga kuankaha ni xi ts'anachakoho ra ndanindo. At'aha incha kjintuyá'yún ko ni xi mjehe ndanindo t'íts'ínkoho.

**B'ǐ ts'ín tsakúya Pablo xi nkú kama kintehe
ni nga kj'uaí ngáha Nda Ntíaná**

3 Katumankjihin ni xu'bi. Nǐstjin xi fekuhu s'e nǐstjin kjuá'un. ²At'aha kamaxkín xuta ko 'yún ts'ín mje toon. Ngak'un kama ko nk'a k'uasje yjoho. Ch'on ts'ín kuinchjane Ntíaná ko najmi kuint'é'éhen xi cháha. Ndjá s'eyaha ko najmi skuenkjún Ntíaná. ³Najmi s'ehe kjuatjo ko najmi kama nimaha xuta. Kuinchjayane xuta ko najmi k'uéch'oho yjoho ni xi kuinchjaha animaha. Kjan kama ko ngjuai kontraha ngayjee ni xi nda. ⁴Tsank'á kama, najmi kama nusihin ni xi incha ts'ín, ko tséjihin ra kjuangak'un. Najmi kuangisjai Ntíaná. Ni xi kuinchja níhi animaha kuangisjai. ⁵B'a incha ts'ín xi benkjún Ntíaná ts'ín, tunga xi nkú ts'ín tjintu kui niu xi kuakúchji nga najmi tjñajihin nga'yún xi Ntíaná tsjáha xuta xi benkjúhun.

N'e t'axihin yjohi xuta xu'bi. ⁶At'aha xi b'a k'un, kui xi xki ni'ya incha fi ko b'anachaha jminchjín xi najmi ndjá tjintuyáha, xi kitsejihin ra ngatitsun ko nt'é'éhen tu mí nihí ni xi nchjaha animaha. ⁷Kui jminchjún xi tehente bangiya tunga ndahá ichí najmi ma bichú mankjín sisihin ni xi naxu tjín. ⁸Xi nkú ts'ín játj'e Jane ko Jambre ngji kontraha Moise nǐstjin nk'ie, b'a ta ts'ín ko kui já xu'bi tífi kontraha ni xi naxu tjín. Najmi nda kjuankjintak'uhun ko yaha nga najmi Ntíaná s'ejihin. ⁹Tunga najmi ngjuaindjukohó ni xi incha y'a, at'aha ngayjee xuta skue kjuanchihini. B'a kamat'ain xi nkú nga ta kamat'ain Jane ko Jambre.

B'ǐ ts'ín kitsjániyáha Pablo Timoteo

¹⁰Ji Timoteo, ja yai sisin ni xi tsakuyá ko xi nkú ts'ian. Ta yai ni xi mjena ts'ian, xi nkú ts'ín s'ejinna, kjuatsentana, kjuatjona, ko xi nkú ts'ín títs'in chúkjuá ni xi tímat'an. ¹¹Yai xi nkú ts'ín kitsjennkí unkiena xuta, ko kjuá'un xi kikie, ko ni xi kamat'an nanki Antiokia, nanki Ikonio ko nanki Listra. Kitsjennkí unkiena xuta tunga Nda Ntíanáhá tsasinkona ajihin ngayjee ni xu'bi.

¹²Kjuaxi nga ngayjee xi mjehe skuenkjún Ntíaná ko Cristo Jesu, kui xi tsjennki unkiehe xuta. ¹³Tunga máha xuta ch'onk'uun ko xi tsank'óo, 'yún ch'onk'un kama sa. K'uanacha ko ta ch'anachaha.

¹⁴Tunga máha ji, ndjá tsijnjajin ni xi tsinchiyái, ni xi tsichu mankjihin. At'aha yai yá xi tsakúyahi niu. ¹⁵N'ekj'áitsjein nga santa nkúhu nga ndyjahi yai nkú títsu xujun éhen Ntíaná. Kui xi tsje. Kui xi tjihin nga'yún nga tsjáhi kjuankjintak'un, at'aha s'ejihin Cristo Jesu ko tǐb'anki. ¹⁶Espirituhu Ntíaná kits'inxájihin xi y'é't'a ngayjee xujun éhen Ntíaná ko kui xujun basinkoná nga bakuyáhaá xuta, nga n'ek'a niyáhaá, nga bixínyahaá má nihi xi najmi nda tjín títs'ín, ko nga 'bai niyáhaá xi nkú ts'ín naxu ngjuaike yjoho. ¹⁷B'a ts'ín xujun tu xi nda

xi ts'ínxát'ahq ra Ntíaná skue sisihin ni xi tjíhin nga ts'ín nga ts'ín xá xi nda.

4 Nginkun Ntíaná kō nginkun Cristo Jesu, kui xi kuasehe ni xi kits'ín xuta xi tjintu tík'un kō xi ja k'ien nk'ie nga kj'uaí kúchji yjoho nga kj'uaítéxuma, tu xí t'bankihí ra nga ²t'eníjmí éhen Ntíaná. Tu nkú b'ahá n'ei tu mí nistjihín ni kō tu mí chubahá ni. T'inyaihi xuta tsa najmi nda tjín ni xi títs'ín, kō n'ek'a niyái, kō t'jennniyáíhi. Kas'e tehentehi kjuatsenta nk'ie nga kuakúyai éhen Ntíaná.

³At'ahq kuichú nistjin nga najmi ta ts'ínsihin ra xuta én nda xi bakuyáá, xi nda ts'ínkoná. Tu sa ní incha kuangisjai nga nkjin nkjún já maestru xi kuakúyahq ni xi tsjoho nga kuínt'é, at'ahq kui niu xi nchjahq animahq. ⁴Ngjuai t'axíhín kō najmi ta kuasínñujuhú ra én xi naxu tjín. Énchá xi nchja xuta incha ts'ínsihin. ⁵Tunga máha ji, tu nkú chqse sisinní ni xi n'ei. N'e chúkjuai kjua'uun. N'ekjas'eihin yjohi nga t'eníjmí éhen Ntíaná. Nda n'etjusuin xáhi.

⁶An bi, ja ma kamaná nku chje xi kuichúsehe Ntíaná. Ja t'ibichú tiña chubq nga k'uejñá asunntej. ⁷Ja tsásinchjahq xi fi kontrahq éhen Ntíaná. Ja tsichu kjet'a niyána. Tu nkú kis'ejihínna Ntíaná. ⁸Ja t'ikuyána nd'ai chjí xi ts'ínkjáíhín xuta xi ja naxu nginkun Ntíaná. Nda Ntíaná tsjána niu, at'ahq naxu ts'ínkō xuta nistjin nga kuase mí nihi xi kits'ín nga nkúnkú. Kō najmi tu nku an tsjána chjí xu'bo. Ta tsjáha ngayjee xuta xi tjoho kō xi t'íncha kuyá nga kj'uaí ngáha.

B'í ts'ín kitsúyahq Pablo Timoteo ni xi mjehe nga ts'ín

⁹N'e kitsq xáíhi yjohi nga nibáqse xatíní. ¹⁰At'ahq nda Dema 'yún tjo saha ni xi tjín asunntej. Ja kits'ín nga mana. Nanki Tesalonika ngji. Nda Krescente ngá ante Galacia ngji, kō nda Tito ja ngji ante Dalmacia. ¹¹Tu nkuhú nda Luko t'jñako sana ej. T'inchísjai nda Marko kō nibákoj, at'ahq kui xi kama kuasínkōna qjihín xána. ¹²Nda Tikiko bi, nanki Efeso kits'ínkjá. ¹³Nk'ie nga nibai, nibákoní najyunna xi ts'inchjén nistjin chunch'óon. Kui xi y'ejñá nanki Troa, ni'yaha nda Karpo. Kō ta nibákoní xujunna. Tu xí najmi tu n'echayaní ichí xi t'jabaxín kamandakoho.

¹⁴Tse nkjún kjuasti kitsjáná nda Alejandro, nda xi ts'ínnda ni k'ichq. Nda Ntíaná k'uechjí ngajoya ngáha ra ni xi kits'ín. ¹⁵Kō ji, chíhín yjohi ndo, at'ahq tu xí 'yúhún ngji kontrahq én xi t'ib'eníjmíáá.

¹⁶Nk'ie nga tjun kinchjantjá yjona nginkun já t'jxóo, najmi ch'a tsasinkōna. Ngayjee y'éntu masenna. Najmi tu kat'axkihí ra Ntíaná ni xi incha kits'ín. ¹⁷Tunga Nda Ntíanáhá tsasinkōna kō kitsjána nga'yún tu xi kama y'eníjmíyehena éhen. B'a ts'ín kint'éhe ngayjee xuta xi najmi ntje judio t'jehen ra. Ts'asje'ana Nda Ntíaná ngabayoo. ¹⁸Kō ta k'uaszejinna qjihín ngayjee ni ch'onk'un xi tjín kō ngjuaikōna

má batéxuma ndjiojmi ján. ¡N'ekié yjoná nga tjihin kjuachánka santaha tu nkjéhé ni! B'a kat'e.

B'i ts'in kits'inkje Pablo xujun

¹⁹Tjeihin kjuasuniñana na Priska ko nda Akila ko xuta xinkjin nda Onesiforo. ²⁰Nanki Corinto y'ejña nda Erasto. Nanki Mileto kisatéch'in nda Trofimo ko yo y'ejña. ²¹N'e'ahí yjohi nga nibáasení kintehe ni nga kj'uaí nistjin chunch'óon. Títs'inkjihi kjuasuniña nda Eubulo ko nda Pudente ko nda Lino ko na Claudia ko ngayjee já nts'eé xi tjin ei.

²²Nda Ntíaná Jesucristo kat'ejñakohi. Ngatentoo kas'enuu kjuandaha Ntíaná.